

**Ákvörðun Samgöngustofu nr. 168/2018 vegna kvörtunar um seinkun á flugi
FI688 þann 6. maí 2017.**

I. Erindi

Þann 29. september 2017 barst Samgöngustofu (SGS) kvörtun frá A (kvartandi). Kvartandi átti bókað far með flugi Icelandair (FI) nr. FI688 frá Orlando til Keflavíkur þann 6. maí 2017 og þaðan með beinu tengiflugi Icelandair nr. FI342 frá Keflavík til Helsinki þann 7. maí 2017. Seinkun varð á brottför flugs FI688 frá Orlando þann 6. maí 2017 vegna breyttrar veðurspár stuttu fyrir flugtak. Áætluð koma á flugi FI688 til Keflavíkur var kl. 06:10 þann 7. maí 2017 en vegna seinkunar var raunveruleg koma kl. 07:47 síðar sama dag, eða einnar klukkustundar og 37 mínútna seinkun. Varð seinkunin til þess að kvartandi missti af bókuðu tengiflugi nr. FI342. Komst kvartandi á lokaákvörðunarstað 6 klukkustundum síðar en upprunaleg flugáætlun gerði ráð fyrir.

Í kvörtuninni kemur fram að kvartandi hafi ekki fengið afhentar upplýsingar um réttindi flugfarþega.

Kvartandi fer fram á skaðabætur samkvæmt reglugerð EB nr. 261/2004 sbr. reglugerð nr. 1048/2012.

II. Málavextir og bréfaskipti

SGS sendi FI kvörtunina til umsagnar með tölvupósti þann 29. september 2017. Í svari FI sem barst SGS þann 30. september 2017 kemur fram að félagið telji sér ekki skyld að greiða skaðabætur þar sem að seinkun megi rekja til óviðráðanlegra aðstæðna. Stuttu fyrir flugtak fékk flugahöfn flugs FI688 þau skilaboð að þoku væri spáð í Keflavík á lendingartíma. Að mati áhafnarinnar þurfti því að auka við eldsneytisborgðir vélarinnar svo að vélin gæti haft möguleika á að nýta Glasgow sem varaflugvöll. Til þess að taka viðbótareldsneyti þurfti að létta vélina sem var gert með því að fjarlægja hluta af farangri úr vélinni. Farangur var síðan fluttur til farþega með öðru flugi daginn eftir. Urðu tafir þessar valdur að 97 mínútna seinkun á komu til Keflavíkur að mati FI.

SGS sendi kvartanda svar FI til umsagnar þann 30. september 2017. Í svari kvartanda sem barst SGS þann 30. október 2017 ítrekar kvartandi kröfur sínar ásamt því að færa fram röksemadir um að veðuraðstæður í Keflavík hafi verið fyrirsjáanlegar.

III. Forsendur og niðurstaða Samgöngustofu

Neytendur flugbjónustu eða aðrir sem hagsmuna hafa að gæta sem telja að flugrekandi, flytjandi, ferðaskrifstofa eða umboðsmaður framangreindra aðila hafi brotið gegn skyldum sínum samkvæmt lögum um loftferðir nr. 60/1998 eða reglugerðum settum á grundvelli þeirra geta beint kvörtun til Samgöngustofu, sbr. 1. mgr. 126. gr. c. loftferðarlaga. Stofnunin tekur málið til skoðunar í samræmi við ákvæði laganna og stjórnsýslulaga nr. 37/1993 og sker úr ágreiningi með ákvörðun, sbr. 3. mgr. 126. gr. c og 140. gr. loftferðalaga, ef hann verður ekki jafnaður með öðrum hætti. Sú ákvörðun er bindandi.

Um réttindi flugfarþega er fjallað í reglugerð EB nr. 261/2004 um sameiginlegar reglur um skaðabætur og aðstoð til handa farþegum sem neitað er um far og þegar flugi er aflýst eða mikil seinkun verður, sem var innleidd hér á landi með reglugerð nr. 1048/2012. Samkvæmt 3. gr. reglugerðar nr. 1048/2012 er Samgöngustofa sá aðili sem ber ábyrgð á framkvæmd reglugerðarinnar samanber 16. gr. reglugerðar EB nr. 261/2004.

Um seinkun á flugi og þá aðstoð sem flugrekandi skal veita í slíkum tilvikum er fjallað um í 6. gr. reglugerðar EB nr. 261/2004. Þar kemur hins vegar ekki fram með skýrum hætti að flugrekandi skuli greiða bætur skv. 7. gr. reglugerðarinnar vegna tafa eða seinkunar eins og átt getur við þegar flugi er aflýst sbr. 5. gr. reglugerðarinnar. Með dómi Evrópusjóðsins frá 19. nóvember 2009, í sameinuðum málum C-402/07 og C-432/07, komst dómstóllinn að þeirri niðurstöðu að túlka bæri reglugerð EB nr. 261/2004 með þeim hætti að farþegar sem verða fyrir seinkun á flugi sínu sbr. 6. gr. reglugerðarinnar, eigi að fá sömu meðferð og farþegar flugs sem er aflýst sbr. 5. gr. Af þessu leiðir að allir farþegar sem verða fyrir þriggja tíma seinkun á flugi sínu eða meira, og koma á ákvörðunarstað þremur tínum seinna eða meira en upprunalega áætlun flugrekandans kvað á um, eiga rétt á bótum skv. 7. gr., nema flugrekandi geti sýnt fram á að töfin hafi verið vegna óviðráðanlegra aðstæðna sem ekki hefði verið hægt að afstýra jafnvel þótt gerðar hefðu verið allar nauðsynlegar ráðstafanir sbr. 3. mgr. 5. gr. reglugerðarinnar. Þetta dómafordæmi var staðfest með dómi Evrópusjóðsins í máli C-11/11 og hefur nú einnig verið lögfest með 6. gr. reglugerðar nr. 1048/2012.

Loftferðalög nr. 60/1998 og reglugerð EB nr. 261/2004 er ætlað að tryggja ríka vernd fyrir farþega sem neytendur flugbjónustu. Meginreglan samkvæmt reglugerð EB nr. 261/2004 er réttur farþega til skaðabóta skv. 7. gr. reglugerðarinnar sé um að ræða aflýsingu eða mikla seinkun á brottfarartíma flugs og ber að skýra undantekningarreglu 3. mgr. 5. gr. reglugerðarinnar þróngt, sbr. dóm Evrópusjóðsins frá 22. desember 2008, í máli C-549/07 Friedericke Wallentin-Hermann v Alitalia og almennar meginreglur um túlkun lagaákvæða.

Fyrir liggur að kvartandi átti bókað far með flugi FI688 frá Orlando til Keflavíkur og frá Keflavík til Helsinki í beinu tengiflugi nr. FI342. Kvartandi missti af tengiflugi FI342 þar sem flug FI688 kom of seint til Keflavíkur. FI hefur borið því við að seinkunin varð vegna óviðráðanlegra aðstæðna. Því telur FI að ekki sé um að ræða bótaskylda seinkun í samræmi við 3. mgr. 5. gr. reglugerðar EB nr. 261/2004.

Í 3. mgr. 5. gr. reglugerðar EB nr. 261/2004, sbr. reglugerð nr. 1048/2012 kemur fram að flugrekanda beri ekki skylda til að greiða skaðabætur í samræmi við 7. gr. ef hann getur fært sönnur á að flugi hafi verið aflýst sökum óviðráðanlegra aðstæðna sem ekki hefði verið hægt að afstýra jafnvel þótt gerðar hefðu verið allar nauðsynlegar ráðstafanir. Við túlkun á óviðráðanlegum aðstæðum skv. reglugerð EB nr. 261/2004 verður að líta til 14. inngangsliðar reglugerðarinnar þar sem fram kemur að óviðráðanlegar aðstæður geti t.a.m. skapast af völdum [...] veðurskilyrða sem samrýmast ekki kröfum sem gerðar eru til viðkomandi flugs.

Fl hefur í málinu lagt fram gögn sem staðfesta að grípa þurfti til skyndilegra aðgerða til að bregðast við breyttum veðurforsendum í flugi FI688 þann 6. maí 2017. SGS felst á að gögnin sýni fram á að aðstæður í máli þessu hafi verið óviðráðanlegar í skilningi 3. mgr. 5. gr. reglugerðar EB nr. 261/2004. Í ljósi framangreinds er kröfu kvartanda um skaðabætur úr hendi Fl hafnað.

Kwartandi virðist ekki hafa fengið skriflegar upplýsingar um rétt sinn í kjölfar seinkunar og telst það brot á 2. mgr. 14. gr. reglugerðar EB nr. 261/2004.

Ákvörðunaronar

Kröfu kvartanda um skaðabætur úr hendi Icelandair skv. reglugerð EB nr. 261/2004 sbr. reglugerð 1048/2012, er hafnað.

Icelandair hefur brotið gegn ákvæðum 14. gr. reglugerðar EB nr. 261/2004 sbr. reglugerð nr. 1048/2012. Er þeim fyrirmælum beint til Icelandair að félagið fari að ákvæðum 14. gr. eftir því sem við á gagnvart hverjum farþega.

Ákvörðun þessi er kæranleg til samgöngu- og sveitarstjórnarráðuneytisins skv. 3. mgr. 126. gr. c loftferðalaga nr. 60/1998 og 18. gr. laga nr. 119/2012 um Samgöngustofu, stjórnsýslustofnun samgöngumála. Kæra skal berast ráðuneytinu innan þriggja mánaða frá því að viðkomandi var tilkynnt um ákvörðun þessa.

Reykjavík, 20. febrúar 2018

Ómar Sveinsson
fagstjóri neytendamála

Davíð Örn Guðnason
lögfræðingur